

Awe Dia Nacional di Portugal of Dia di Luis vas de Camoes

Gran celebracion di hubileo di oro di comunidad Portugues na Aruba

ORANJESTAD – Awe dia 10 di juni, comunidad Portugues na Aruba ta celebrando 50 aña di existencia. Pero tambe nan ta celebra Dia Nacional di Portugal of Dia di Luis vas de Camoes. Pa e gran celebracion aki lo tin acto protocolar na Wilhelmina Park pa 4:30 di atardi.

Ya a bira un custumber caba cu tur aña na Aruba ta wordo celebra Dia Nacional di Portugal of Dia di Luis vas de Camoes y dia di comunidad Portugues rond mundo. E dia aki lo ta dedica na 10 Portugues pa asina gradici nan pa nan dedicacion y nan gran esfuerso. Nan a contribui semper na bienestar di Club Portugues y den e trayecto di celebracion di dia Nacional di Portugal. Esaki lo ta e

promer biaha cu ta haci esaki den forma di gratitud inmenso y duna e personanan aki nan honor mereci.

Actividadnan

Diasabra pa 7'or di anochi lo cuminsa e celebracion di Dia Nacional di Portugal na Club Primavera. E anochi aki lo ta uno grandi ya cu directiva y comision di Dia Di Portugal a traha masha duro pa e celebracion aki entrada ta gratis. Nan ta pidi pa tene cuenta cu e dress code pa e ocasion aki cu mester ta formal, ya cu e ta nos celebracion di Oro.

E Anochi aki lo bay tin un programa hopi varia cu Baile Canto y poesia.

E aña aki nan ta bay tin un grupo Portugues cu lo bin di Venezuela. Nan ta e banda musical ALMA LUSA. Nos



grupo folklorico Portugues Primavera tambe lo deleita boso cu musica y baile! Lo tin grupo di baile infantil, hubenil y tambe un grupo di baile adulto cu lo trece bunita recuerdo na esunnan presente. Lo tin exposicion di Aventura Quimerais, recordando asina e celebracionnan di Dia

di Portugal na Aruba. E cushina lo ta surti cu entre otro Bacalao y Espetada Portugues, Bolo do caco y mucho mas.

Diadomingo 14 di juni 2015 lo ti un celebracion cultural pa 5'or di atardi. E lo ta un diadomingo di y pa famia

completo, pues un y tur ta cordialmente invita. E Atardi Cultural aki lo trece e sentimento nan di Portugal na Club Primavera. Lo tin bazaar, cuminda nan tipico Portugues, cosnan dushi Portugues y hopi mas. Como recuerdo di nan gran celebracion nos lo tin na benta mug na balor di 15fl. Esaki ta pa contribui pa nan fundacion y alabes bo tin un recuerdo di 50 aña en conexion cu e Dia di Portugal

Directiva FSCP y Comision Dia di Portugal, ta haci un invitacion general na henter pueblo di Aruba y Portuguesnan residencia aki na Aruba pa bin y celebra e 50 aña di dia di Portugal na Aruba. Nan kier a gradici tur esunnan cu di un of otro forma a yuda Club Primavera. □